

Sámi joatkkaskuvla ja boazodoalloskuvla

Rektor Mathis Persen Bongo 18.8.2021

Sámi joatkkaskuvla ja boazodoalloskuvlla ohppiide

Mun háliidan sávvat bures boahtima ođđa skuvlajahká!

Bures boahtin didjiide geat lehpēt juo ovdal leamaš dáppe studeantan/oahppin. Ja earenoamážit sávan bures boahtima didjiide geat dál lehpēt álgime Sámi joatkkaskuvlii ja boazodoalloskuvlii.

Mu namma lea Bonggu Máhtte, Mathis Persen Bongo ja mun lean ođđa rektor dáppe. Mun lean álgán rektorin moadde vahku áigi.

Mii illudit go dii lehpēt válljen váldit oahpu dáppe min skuvllas. Dáppe oažžubehtet earenomáš vejolašvuoda váldit joatkkaoahpu, danne go dán skuvllas leat earenomáš čeahpes oahpaheaddjit ja bargit, geat addet dutnje buori bálvalusa.

Mii geat bargat dáppe háliidit ahte dii geat lehpēt oahppit galgábehtet loaktit bures dáppe, sihke fágalaččat ja sosiálalaččat, ovttas buot mielohppiiguin ja bargiiguin dáppe.

Mis lea oktasaš mihttu ahte daid jagiid go dii lehpēt dáppe min skuvllas, de dii ovdánahttibehtet iežadehtet máhtu, gálggaid ja guottuid. Danne go dát addet didjiide buresbirgejumi eallimis ja iešguđet bargguin ja oktavuodain servodagas.

Mun lean maid leamašan studeantan/oahppin sihke Sámi joatkkaskuvllas Guovdageainnus ja Sámi joatkkaskuvllas Karasjogas, loahpageahčen 70 logus ja álggus 80 logu. Dát jagit adde munnje buori ja oadjebas oahppandilálašvuoda, mii movttiidahtii mu eanet oahpu gazzat. Nu šattai dát álgun mu oahppanbálgás maid lean čuvvon viidáseappot skuvlavázzimis.

Mii háliidit ahte dii maid galgábehtet vásihit buriid ja oadjebas oahppanproseassaid gos mis buohkain lea lagas čuovvoleapmi, čielga jođiheapmi ja neavvun juohke dásis.

Mis lea ge ovddasvástádus láchit buriid oktavuodaid sihke du ja bargiid gaskka, du ja eará ohppiid gaskka, ja skuvlla ja váhnemiid gaskka. Olmmošlašvuhta, dohkkeheapmi ja dássásašvuhta ohppiid ja bargiid gaskka galgá leat min skuvlla dovdomearkan.

Mii háliidit ahte dii oahppit aktiivvalaččat lehpēt mielde skuvladedemokratijjas, nugo ohppiidráđis ja skuvlaservodagas, nu ahte skuvla šaddá ealli, guoibmás, somás ja buorre oahppanbáikin.

Mannan skuvlajahki lei várra earenomáš buohkaide, go skuvla korona geažil šattai stengejuvvot, ja nu šattaidet eará ládje oahpu gazzat, go oahpahus lágiduvvui neahta bokte. Dát lei ođđa ja dehálaš vásáhus midjiide buohkaide, ja dalle mii beasaimet vásihit movt teknologijja bokte sáhtta oážžut oahpu, ja movt galggašii lágidit skuvladiimmuid. Korona dilli dagahii ahte ehpet dii ge beassan nu ollu ovttas leat go ovdal. Danne fertet muitit man dehálaš ovtastallan lea, Leahkit ovttas earáiguin skuvlavázzimis ja veahkkálaga hukset ođđa máhtu ja oážžut ođđa lihkestuvvamiid.

Dát skuvlajahki orru fas šaddama eambbo normálan ja nu lea ge mis vejolaš eambbo leat ovttas. Nu mii háliidit ge ahte dii lehpet dáppe skuvllas ollu, nu ahte mii bargit beassat oahpásnuvvat didjiide bures, ja ahte mii beassat guldalit din oaiviliid ja jurdagiid, ja nu leat mielde oassálastime din skuvlaárgabeaivvis.

Movt dii loaktibehtet skuvllas, lea sihke din iežadet, oahpaheddjiid ja bargiid duohken. Lea min bargiid ovddasvástádus hukset iešguđetlágan ja oadjebas oahppandilálašvuodaid didjiide nu ahte dii beassabehtet leat aktiivvalaččat, sáhkkit ja inkluderejeaddjit skuvladiimmuin ja skuvllas muđui. Nu galgat mii fárrolaga leat mielde bidjame dási oahpahussii mas sihke dii, mieloahppit, oahpaheaddjit ja eará bargit leat veahkin.

Go mii ovttasbargat, de sáhttit mii ovttas hukset dan buot buoremus oahppandilálašvuoda ja dan buot buoremus skuvlabirrasa, nu ahte dus, du mieloahppiin ja bargiin šaddá buorre ja oadjebas oahppan- ja bargobiras ja nu ahte buohkain lea buorre Leahkit dáppe.

Loahpas áiggun vel oktii sávvat didjiide *bures bohtin min skuvlii!* Ja sávan dan buot buoremusa buohkaide!

Giitu!